

Koa noa mai ra te wahine 'Ati-Puhi!¹¹
 Tahuri mai o mata te tihi¹² ki 'Tirau
 Mowai rokiroki, ko te huna i te moa;
 I makere iho ai te tara o te marama, e-i.

¹Hoturoa.—Ko te rangatira o runga i a Tainui waka.

²He hinganga rangatira.

³He roto kei Heretaunga.—He maha nga parekura i reira.

⁴E tata ana a Kahotea ki te Roto-o-Tara. I mate a Te Momo ki reira.

⁵Te Rauparaha nui.

⁶Toheapare.—Ki etahi whakahua ko Toheata. He ingoa no Te Whatanui o Ngati-Raukawa; he uri na Pare-Wahawaha.

⁷Ahuriri.—Ko te moana i Nepia; hei tikanga mo Heretaunga.

⁸Te Wera.—Ko Te Wera Hauraki, he toa no Nga-Puhi, i noho ki Nukutaurua i te Mahia. Nana i awaina a Ngati-Kahungunu.

⁹Pareihe.—Ko te rangatira o te ope a Ngati-Kahungunu ki Heretaunga.

¹⁰Uru mahora.—Ki etahi whakahua 'uru mawhai.' E kiia ana he uru mahora nga uri a Te Momo.

¹¹Ati-Puhi.—No Nga-Puhi a Peketahi, te tangata nana a Te Momo i patu.

¹²Ki etahi tuhituhi e penei ana, "Tahuri mai o mata te tikitiki rau mokimoki!" Engari he he tera, ahakoa e aronga ana ano i runga i te tatai tangi o te waiata nei. Ko 'Tirau he whakapotonga mo Titiraupenga, no reira nei a Te Momo.

Kei te J.P.S. 9/136 ano te waiata nei na Takaanini Tarakawa i tuku. Kei reira e whakamaramatia ana na Ahumai tenei waiata mo tona tungane mo Te Momo-o-Irawaru. He tamahine a Ahumai na Karangi He taupatupatu tena kei roto i te whanau kotahi.

He pai te kaupapa o tenei waiata; he tangi tetahi wahi apiti tonu atu he kai-oraora, he kohukohu mo nga rangatira nana te ope i mate ai a Te Momo.

42.—HE WAIATA AROHA MO TE TOMO.

Na Te REREHAU. (Ngati-Tuwharetoa.)

E ki ana a Te Taite Te Tomo na Te Rerehau tenei waiata, he waiata aroha mo tona tane mo Te Tomo, ko tetahi nei o ona ingoa ko Tute. No te haerenga o Te Tomo ki Otaki, ka haria ia raua tamaiti a Tauaiti, e kiia nei ko Te Piwa Te Tomo. Ko tetahi taha o Te Tomo no Ngati-Raukawa, ka whanaunga ki tera Ngati-Raukawa i Otaki ra. I waiatatia mai te waiata nei i Te Wera, Hauhungaroa, i te taha hauauru o Taupo. I moe a Te Piwa i a Kerenapu, tamahine a Henere Te Herekau, he minita, no te Hahi Mihinare, no Ngati-Whakaterere, hapu o Ngati-Raukawa.

I taia ano te waiata nei ki Nga Moteatea p. 168, ki S.L. p. 235. He tauriterite tonu nga kupu o era. Ko te ahua o era he mea whakawhitiwhiti i muri nei, a ko te kaupapa mai ko tenei ka taia i raro iho nei.